

遼  
詩  
紀  
事

PL  
2533  
.C4





YORK UNIVERSITY  
JUN 1 2011  
100-100-1000



Digitized by the Internet Archive  
in 2010 with funding from  
York University Libraries



2533  
.c4  
YORK UNIVERSITY

JUN 5 - 2001

EAST ASIAN STUDIES

遠  
詩  
紀  
事

李宜龔  
著





遼金元詩紀事總敘

詩紀事之體。專采一代有本事之詩。殆古人所謂詩史也。國可亡。史不可亡。卽詩不可亡。有事之詩。尤不可亡。然或以爲異族而主中國。則其國之詩可聽其亡。於是宋之計有功氏。清之厲鶚氏。陳田氏。有唐詩紀事。宋詩紀事。明詩紀事。而遼金元闕如。然則李君拔可之有造詩林。可謂能見其大者矣。余舊有元詩紀事之作。沈濤國、端甸齋、黃鮮菴、梁節菴諸君。共爲印行。繼復有所增損。則高君夢旦與拔可。於所設書坊印行之。近拔可知余尙有遼詩金詩二紀事。則大喜。以爲遼金元三代詩史。不可無一。不能有二。合諸唐宋明三巨帙。而告大全。尤不可不亟爲行世。商於王君岫廬。欣然同意。乃合三紀事爲同式之印版焉。昔南宋陳思陳起。聚羣賢江湖兩種小集。各百十家。



版行於杭州書坊原書爲竹垞先生所稱慕。至今流傳。則此本之流傳。更非區區南宋一隅之關繫比哉。丙子年三月五日石遺老人衍書於上海之墨巢。



遼詩紀事敘

自阿保機建造遼國。歷九主一百有六年。至天祚保大而亡。享國與女真相等。而文化遠不逮。以詩歌而論。家數多寡已縣絕。說者以爲耶律氏世尙武勇。后妃皆習鞍馬。中葉宗眞尙能日射三十六熊。末造弘基延禧。猶射獵遊畋。文事素所不重歟。然攷遼史各紀傳。聖宗有賜蕭撻凜平敵烈部嘉獎詩。興宗有酒酣賦詩。賜耶律和覩袞詩。賜皇太弟重生子詩。召宋使釣魚詩。賜蕭惠生日詩。褒耶律幹特刺詩。道宗有君臣同志華彝同風詩。東丹王有太祖將還獻歌。起書樓作樂田園詩。耶律孟簡有放懷二十首詩。韓延徽有懷鄉里詩。蕭孝穆蕭撒八。有和興宗詩。張儉呂德懋。有奉命美陳昭袞詩。今諸作皆不傳。雖由其國嚴禁文字出境。亦所作未臻佳妙。雖出境亦未



必流傳。非若燕支祁連勒勒川諸歌。橫絕一世。不脛而走也。顧吾以爲遼地據朔漠。風氣大遠於中原。又全國貴仕。不出耶律蕭二族。中土人士。非萬不得已。誰樂歸附者。完顏氏則奄有山左右河南北區域。幽并燕趙之氣。濟以海岱河嶽之英靈。益以大定明昌泰和數十年之作人。耆宿党懷英。宇文虛中。吳激。蔡松年之倫。濡染沾溉。故黃華閒閒。遺山鶴鳴輩。以逮河汾諸老。蔚爲詩歌。視天水南渡。幾有過無不及。遼則名家寥寥。當於懿德皇后。首偁一指。次則文妃色色。耶律乙辛。東丹王諸人而已。其左企弓。虞仲文。張通古。魏道明。甯鑿。王樞等詩。當入金。馬擴詩。當入宋。燕人題韓魏公祠。在靖康後。其時遼已亡。近人繆荃孫氏。皆闌入遼文存。有失斷限。余旣繼計有功氏厲鶚氏。爲元詩紀事若干卷。行世有年。遼金雖偏安。同爲異族主中國。



者。當其恃強猾夏。固一世之雄也。而脫脫二史。罕有過而問者。亦終等齊景公之無得而稱。轉不如十卷之中州集。一卷之焚椒錄。尙足供人覽觀。用先緝遼詩紀事十二卷。中附西夏高麗兩屬國之作。亦可謂具體而微。其遼文存於高麗鄭瓜亭等詩。不知其爲李齊賢張晉公之作。出於高麗史。淳欽皇后囚耶律都沁誓語。以爲出都沁傳者。遼史並無此傳。王仁俊氏遼文萃逸目攷。興宗五詩。皆誤以屬聖宗。賜蕭惠詩。不知其見本傳。宗室傳並未言寧王放鶴及移芍藥詩。蕭孝穆蕭撒八和興宗詩。並不見本傳。亦見興宗本紀。皆藉得辨正。亦免閱遼痕遼文續拾者。將誤就誤云。柔兆困敦陬月八十一交衍書。





遼詩紀事總目

卷一

聖宗 興宗 道宗

卷二

懿德皇后 文妃蕭氏

卷三

東丹王倍

卷四

趙延壽 李澣 耶律某 劉涇 劉三嘏 馬堯俊 趙良嗣

馬賢良 耶律乙辛 王鼎 鄭若愚 韓資讓 趙庭睦 梁

援 趙長敬 馬元俊 劉瓌 史仲愛 曲正夫 王執中

于復先 王仲華 孟初 張識 楊滌瑕 李師範 李□□

張□□ 寇□□ 張嶠 韓汝礪 李頌 胡嶠

卷五

劉元英

卷六

郎思孝 智化 善□ 性連 性鑒 文首座

卷七

張元

卷八

高麗王徽 朴寅亮 朴景綽 韓繳如 魏繼延 李資諒  
張晉公 金緣 金黃元 康日用 李齊賢 高麗國師 無



名氏 無名氏 無名氏

卷九

墨鴉詩 題關西驛舍 寄夫詩

卷十

鼓吹曲

卷十一

述律后童謠 囚耶律都沁誓語 焚骨咒辭 幽州謠 墓志

中韻語 懿德皇后宮中語 楊佶歌 歎蕭巖壽語 臻蓬蓬

歌 伎者歌 北人諺 時諺 天祚時諺 契丹小兒俗語

小人歌 賣地券語

卷十二

甘露寺鬼 遼故宮美人



遼詩紀事卷一

侯官陳衍緝

聖宗



聖宗諱隆緒小字文殊奴景宗長子在位四十九年

遼史幼喜書翰十歲能詩既長曉音律好繪畫

契丹國志尤喜吟詩出題詔宰相以下賦詩詩成進御一一讀之優者賜金帶又御製五百餘首又親以契丹大家譯白居易諷諫集詔諸臣讀之

遼史蕭勞古國舅少父房之族以善屬文爲聖宗詩友

傳國璽詩

一時製美寶千載助興王中原既失鹿此寶歸北方子孫宜慎守世

業當永昌

珩璜新論仁宗朝有使遼者見遼主傳國璽詩云云

句

樂天詩集是吾師

古今詩話遼人好樂天詩聞遼主有詩云云

興宗

興宗諱宗真字夷不堇小字只骨聖宗長子在位二十五年  
遼史興宗好儒術通音律重熙五年四月幸后弟蕭無曲第  
曲水泛觴賦詩九月獵黃花山獲熊三十六賞獵人有差十  
月幸南京御元和殿以日射三十六熊賦幸燕詩試進士於  
廷案施宜生邵武人宋潁州教授以罪北走仕金試一日獲



三十六熊賦擢第一宜生改姓名方人也賦破題云雲屯八百萬騎日射三十六熊遼時御試初開又復親幸貢院故百年之久尙傳其盛而海陵亦以此命題程史謂海陵校獵亦獲熊三十六非也又張端義貴耳錄云不知實有此事以熊爲射侯而非獸尤誤

又六年六月賜南院大王耶律胡覩袞命上親爲製誥詞並賜詩以寵之七月以皇太弟重元生子賜詩及寶玩器物又二十四年二月召宋使釣魚賦詩

又北樞密使蕭惠請老封魏國王旣歸遣賜湯藥及他賜賚不絕遇生日輒賜詩以示尊寵

以司空大師不肯賦詩以詩挑之

遼詩紀事卷三  
二  
爲避綺吟不肯吟既吟何必昧真心吾師如此過形外弟子爭能識  
淺深

遼東行部志得海山文集乃遼司空大師居覺花島海雲寺  
時所製也故目其集曰海山師姓郎名思孝蚤年舉進士第  
更歷郡縣一日厭棄塵俗祝髮被緇已而行業超絕名動天  
下當遼興宗時尊崇佛教自國主以下親王貴主皆師之嘗  
錫師號曰崇祿大夫守司空輔國大師凡上章表名而不臣  
興宗每萬機之暇與師對榻以師不肯作詩先以詩挑之云  
云師和之云云二相謂社令公劉侍中也後題松鶴圖云云

### 道宗

道宗名弘基字涅鄰小字查利興宗長子在位四十六年



遼史清寧三年八月帝以君臣同志華夷同風詩進皇太后

題黃菊賦後

昨日得卿黃菊賦碎剪金英填作句

佳一作作句

袖中猶覺有餘香冷落

西風吹不去

老學庵筆記遼相李儼作黃菊賦獻其主耶律弘基弘基作

詩題其後以賜之云云

案李儼卽耶律儼本姓李見遼史本傳

蕤獻詞話遼主得其臣所獻黃菊賦題其後云云元張肯繼

孟鑾括其辭寄蝶戀花曰昨日得卿黃菊賦細剪金英題作

多情句冷落西風吹不去袖中猶有餘香度滄海塵生秋日

暮玉砌雕闌木葉鳴疎雨江總白頭心更苦素琴猶寫幽蘭

譜

句

行高峯頂松千尺戒淨天心月一輪

補續高僧傳法均京西紫金寺非辱律師收爲童子究律學  
謹持犯清寧中被徵較定諸家章鈔咸雍間授榮祿大夫守  
司空寵以詩章有云云之句其見重如此



遼詩紀事卷二

宮闈

侯官陳衍緝

懿德皇后

后蕭氏小字觀音樞密使惠女

遼史姿容冠絕工詩善談論自製歌詞尤善琵琶伶官趙惟一得侍左右太康初宮婢單登教坊朱頂鶴誣后與惟一私樞密使耶律乙辛以聞詔乙辛與張孝傑劾狀因而實之族誅惟一賜后自盡

伏虎林應制

威風萬里歷南邦東去能翻鴨綠江靈怪大千俱破膽那教猛虎不投降

焚椒錄清寧二年八月上獵秋山后率妃嬪從行在所至伏  
虎林命后賦詩后應聲云云上大喜出示羣臣曰皇后可謂  
女中才子次日上親射獵有虎突林而出上曰朕射得此虎  
可謂不愧后詩一發而殪羣臣皆呼萬歲

君臣同志華夷同風應制

虞廷開盛軌王會合奇琛到處承天意皆同捧日心文章通蠡谷聲  
教薄鷄林大寓看交泰應知無古今

焚椒錄清寧三年秋上作君臣同志華彝同風詩后應制屬  
和云云

回心院十首

埽深殿閉久金鋪暗游絲絡網塵作堆積歲青苔厚階面埽深殿待

君宴

拂象牀憑夢借高唐敲壞半邊知妾臥恰當天處少輝光拂象牀待  
君王

換香枕一半無雲錦爲是秋來轉展多更有雙雙淚痕滲換香枕待  
君寢

鋪翠被羞殺鴛鴦對猶憶當時叫合歡而今獨覆相思塊鋪翠被待  
君睡

裝繡帳金鉤未敢上解卻四角夜光珠不教照見愁模樣裝繡帳待  
君睨

疊錦茵重重空自陳只願身當白玉體不願伊當薄命人疊錦茵待  
君臨



展瑤席花笑三韓碧笑妾新鋪玉一牀從來婦歡不終夕展瑤席待君息

別銀燈須知一樣明偏是君來生彩暈對妾故作青熒熒別銀燈待君行

蕪薰鑪能將孤悶蘇若道妾身多穢賤自霑御香香徹膚蕪薰鑪待君娛

張鳴箏恰恰語嬌鶯一從彈作房中曲常和窗前風雨聲張鳴箏待君聽

焚椒錄后常慕唐徐賢妃行事每於當御之夕進諫得失國俗君臣尙獵故有四時捺鉢上旣擅聖藻而尤長弓馬往往以國服先驅所乘馬號飛電瞬息百里常馳入深林邃谷扈

從求之不得后患之上疏諫獵秋山上雖嘉納心頗厭遠咸  
雍之末希得幸御后因作詞曰回心院被之管絃以寓望幸  
之意其詞云云

懷古

宮中只數趙家妝敗雨殘雲誤漢王惟有知情一片月曾窺飛燕入

昭陽

詳耶律  
乙辛下

絕命詞

嗟薄祜兮多幸羌作儷兮皇家承昊穹兮下覆近日月兮分華託後  
鈎兮凝位忽前星兮啓耀雖豐累兮黃牀庶無罪兮宗廟欲貫魚兮  
上進乘陽德兮天飛豈禍生兮無睽蒙穢惡兮宮闈將剖心以自陳  
冀迴照兮白日寧庶女兮多慚曷飛霜兮一擊顧子女兮哀頓對左

右兮摧傷共西耀兮將墜忽吾去兮椒房呼天地兮慘悴恨今古兮  
安極知吾生兮必死又焉愛兮日夕

焚椒錄后自盡時乞更面可汗一言而死不許乃望帝所而  
拜絕命詞云云遂閉宮以白練自經年三十有六正符白練  
之數聞者莫不冤之

文妃蕭氏

妃小字瑟瑟色一作色渤海人幼選入宮天祚卽位册爲文妃

諷諫歌

莫一作句嗟塞上兮暗紅塵勿傷多難兮畏邊人一作強鄰不如塞却一作却字

姦邪之路兮選取賢臣直須臥薪而一無字嘗膽兮激壯士之捐身便

便一無字可以朝清漠北沙一作漠兮夕枕燕雲



契丹國志曰文妃幼選入宮聰慧閒雅詳重寡言自少時工  
文墨善歌詩時作歌以諷諫云云其譏切不避權貴如此

詠史

丞相來朝劍佩鳴千官側目寂無聲養成外患寇一作盜嗟何謀一作將及禍

盡忠良罰不明一作不行諫親戚並一作盡連一作居藩屏一作翰位私門潛蓄

爪牙兵可憐往代一作世秦天子枉一作猶向宮中望太平

侯鯖錄契丹天祚文妃喜文墨嘗作詠史詩以諷諫云云被  
誅後其子晉王誦經受誅母子俱賢也

遼史女真亂作日見侵迫帝畋遊不恤忠臣多被疏斥妃作  
歌諷諫云云又歌云云天祚見而銜之播遷以來郡縣所失  
幾半諸皇子敖盧幹最賢素有人望元后兄蕭奉先深忌之

誣南軍都統余覩謀立晉王以妃與聞賜死

案詠史一首體格自是律詩遼史乃每句第四字下加一兮  
字不今不古今不從

遼詩紀事卷三

宗室

侯官陳衍緝

東丹王倍

倍小字圖

一作突

欲太祖長子封東丹王讓位德光奔唐後見

害於李從珂世宗追諡曰讓國皇帝廟號義宗

堯山堂外紀東丹王汎海奔唐載書數千卷習舉子每通名  
刺云鄉貢進士黃居難字樂地以擬白居易字樂天也

海上詩

小山壓大山全無力羞見故鄉人從此投外國

遼史太祖破渤海大諲譔改其國曰東丹以倍爲人皇王主  
之後讓位德光德光既立見疑以東平爲南京徙倍居之置



衛士陰伺動靜倍命王繼遠撰建南京碑起書樓於西宮作  
樂田園詩唐明宗聞之使人跨海持書密招倍倍立木海岸  
刻詩云云攜高麗美人載書浮海而去明宗賜姓東丹名慕  
華復賜姓李名贊華倍初市書至萬卷藏於醫巫閭絕頂之  
望海堂善畫本國人物皆入宋祕府

遼詩紀事卷四

侯官陳衍緝

趙延壽

延壽本姓劉恆山人爲滄州節度使裨將趙得鈞養子冒姓  
趙降遼官至錄尚書事都督中外諸軍事

遼史少美姿容好書史唐明宗妻以公主拜駙馬都尉降於  
太宗以爲幽州節度使封燕王魏王敗杜仲威賜龍鳳赭袍  
因李崧求爲皇太子上曰吾於魏王雖割肌肉亦不惜但皇  
太子須天子之子得爲蓋上嘗許滅晉後以中國帝延壽故  
摧堅破敵延壽常以身先焉

虜廷感賦

黃沙風捲半空拋雲重陰山雪滿郊探水人回移帳就射鵬箭落著  
弓抄鳥逢霜果飢還啄馬渡冰河渴自跑占得高原肥草地夜深生  
火折林梢

太平廣記趙延壽將家子幼習武略卽戎之暇復以篇什爲  
意嘗在虜廷賦詩云云南人往往傳之

李澣

一作  
澣

澣後唐天成中擢進士第仕遼爲宣政殿學士有應曆小集  
十卷

通志藝文略李澣晉末人陷契丹以僞遼應曆年號名集案  
宋志有李澣丁年集十卷

留題座主和凝舊閣



座主登庸歸鳳閣門生批詔立鼇頭玉堂舊閣多珍玩可作西齋潤  
筆不

玉壺清話李澣登科在和凝榜下同爲學士會凝作相澣爲  
承旨當批詔次日於玉堂舊閣悉取圖書器玩留一詩於榻  
上云云人皆笑其疏縱

耶律某

句

父子盡從蛇陣沒弟兄空望鴈門悲

詩話總龜北虜多有文籍亦以文雅相尙王矩爲工部郎中  
本燕人爲虜將耶律某忘其名掌書記嘗從其出入耶律兄  
及兄之子太平興國中戰沒於邊郡後耶律經舊戰處覽其

遺迹作詩矩記其兩句云云

劉涇（案宋史作京藝文志有劉京集四十卷遼史拾遺作景遼

詩話作經）

遼史聖宗紀開泰二年戶部侍郎劉涇加工部尚書百官志

劉涇爲禮部尚書

句

野韭寒猶長沙泉晚

一作淺

更清

譚苑契丹通事舍人劉涇奉使路中有野韭可食味絕佳作

詩云云

劉三嵎

三嵎河閒人遼駙馬都尉慶曆中奔宋遣歸

自陳詩

雖慙涪勺赴滄溟仰訴丹衷不爲名寅分星辰將降禍兌方疆寓卽  
交兵春秋大義惟觀釁王者雄師但有征救得燕民歸舊主免於戎  
虜自稱兄

儒林公議契丹既有幽薊及鴈門以北亦開舉選以收士人  
薊州劉氏昆弟其名曰二玄三嘏四端五常六符均在被遇  
三嘏四端復尙僞主慶曆年秋三嘏攜嬖妾偕一子投廣信  
軍詞情悲切自言僞主兇狠皆有所私久已離異今秋虜主  
逼令再合僞主兇狠必欲殺其妾與子故歸朝廷頗詢其國  
中機事言虜主已西伐元昊幽薊已虛我舉必克所謀凡七  
事復爲詩以自陳云云朝廷以誓約旣久三嘏虜壻位顯恐



納之生釁又移文邊郡躡知三嵎未還求索峻切期於必得  
不然則舉兵隳好矣朝廷乃遣還三嵎復由西山路入定州  
境所至以金賂村民求宿食勢亦窘迫定帥遣人搜索拘送  
虜界比三嵎至幽州其妻已先在矣乃殺其妾與子械三嵎  
送虜主帳前以其舅弟皆方委任遂貸三嵎死使人監錮之  
議者深嘆惜其事

遼史劉愼行累遷至北府宰相子六人一德二元三嵎四端  
五常六符嵎端符皆進士嵎端俱尙主爲駙馬都尉三嵎獻  
聖宗一矢斃雙鹿賦上嘉其贍麗與公主不諧奔宋歸殺之

馬堯俊

獻高麗王詩

始從鉤裂海東天世世英雄稟自然掌上寶符鈐造化胸中神劍畫  
山川太宗莫取龍州道煬帝難乘鴨綠船真是金輪長理國豈論八  
萬四千年

文昌雜錄元豐三年十一月一日高麗王生辰遼遣起居郎  
知制誥馬堯俊充使留仙賓館堯俊獻徽詩云云徽以錦綉  
八百匹爲謝云

趙良嗣

良嗣本燕人馬植世爲遼大族仕至光祿卿降宋易姓名

過五鬘宣政等殿作

建國舊碑明月暗興王故地野風乾回頭笑向王公子騎馬隨軍上

五鬘

北遼遺事宣和二年以右文殿修撰由登州泛海使金議夾  
攻遼人四月與金主相見於龍崗復入上京看遼大內並乘  
馬過五鸞一作宣政等殿良嗣有詩云云於是定議歲輸五  
十萬約宋兵自雄州趨白溝夾攻

程史余讀北遼遺事見趙良嗣與王瓌使金隨金攻遼上京  
城破有詩云云五鬢卽會寧乃契丹所謂西樓者實耶律之  
咸鎬豐沛良嗣世仕其國身踐其朝貴爲九卿一旦決去視  
宗國顛覆殊無禾黍之悲反吟詩以志喜其爲人從可知也  
見金主歸作

朔風吹雪下雞山獨暗穹廬夜色寒聞道燕然好消息曉來驟騎報  
平安



茅齋自敍宣和四年十一月金主見良嗣許割燕京薊景檀  
順涿易六州二十四縣每歲要以所賂契丹銀絹良嗣歸有  
喜色作詩云云副使馬擴和詩云未見燕銘勒故山耳聞殊  
議骨毛寒願君共事烹身語易取皇家萬世安擴見良嗣妄  
生邊釁預知金將敗盟故和詩寓諷之之意

馬賢良

賢良燕人

獻郭藥師詩

聞說將軍曉入燕滿城和氣接堯天油然黶黷三千士雨洗兵戈二  
百年

封氏編年宣和四年十月郭藥師以常勝軍入燕城時有燕

人馬賢良者獻詩云云

耶律乙辛

乙辛字胡覩袞五院部人官至南北院樞密使封王以罪縊

殺

十香詞

青絲七尺長挽作內家裝不知眠枕上倍覺綠雲香  
紅綃一幅強輕闌白玉光試開胸探取尤比顫酥香  
芙蓉失新豔蓮花落故妝兩般總堪比可似粉腮香  
螭蟻那足並長須學鳳凰昨宵歡臂上應惹領邊香  
和羹好滋味送語出宮商定知郎口內含有煖甘香  
非關兼酒氣不是口脂香卻疑花解語風送過來香

既摘上林蕊還親御院桑歸來便攜手纖纖春筍香  
鳳鞞拋合縫羅韞卸輕霜誰將煖白玉雕出軟鉤香  
解帶色已戰觸手心愈忙那識羅裙內銷魂別有香  
咳唾千花釀肌膚百和香元非噉沈水生得滿身香

焚椒錄懿德皇后蕭氏爲北面官南院樞密使惠之少女母  
耶律氏夢月墜懷已復東升光輝照爛不可仰視漸升中天  
忽爲天狗所食驚寤而后生時重熙九年五月己未也母以  
語惠惠曰此女必大貴而不得令終且五日生女古人所忌  
命已定矣將復奈何以清寧元年十二月戊子册爲皇后后  
方出閣升坐扇開簾卷忽有白練一段自空吹至后褥位前  
上有三十六三字后問此何也左右曰此天書命可敦領三



十六宮也明年后生皇子濬皇太叔重元妃入賀每顧影自  
矜流目送媚后語之曰貴家婦宜以莊臨下何必如此妃銜  
之歸罵重元曰汝是聖宗兒豈虎斯不若使教坊奴得以可  
敦加我汝若有志當除此帳笞撻此婢於是重元父子合定  
叛謀於九年七月駕幸灤水聚兵作逆須臾軍潰父子伏誅  
而討平此亂則知北樞密事趙王耶律乙辛與有功焉尋進  
南院樞密使威權震灼傾動一時惟后家不肯相下乙辛每  
爲怏怏及咸雍初皇子濬册爲皇太子益復蓄奸爲圖后計  
矣咸雍之末上稀幸御后因作詞曰回心院被之管絃以寓  
望幸之意時諸伶無能奏演此曲者獨伶官趙惟一能之而  
宮婢單登故重元家婢亦善箏及琵琶每與惟一爭能怨后

不知己后乃召登對彈四且二十八調皆不及登媿恥拜服  
於時上嘗召登彈箏后諫曰此叛家婢女中獨無豫讓乎安  
得輕近御前因遣直外別院登深怨嫉之而登妹清子嫁爲  
教坊朱頂鶴妻方爲耶律乙辛所暱登每向清子誣后以爲  
不足證實更命他人作十香淫詞云云用爲誣案乙辛陰屬  
清子使登乞手書登時雖外直常得見后后善書登給后曰  
此宋國忒里蹇所作更得御書便稱二絕后讀而喜之卽爲  
手書一紙紙尾復書己所作懷古詩一絕云云登得后手書  
持出與清子云老婢淫案已得況可汗性忌早晚見其白練  
挂粉脰也乙辛已得書遂構詞命登與朱頂鶴赴北院陳首  
伶官趙惟一私侍懿德皇后有十香淫詞爲證乙辛乃密奏

上曰太康元年十月二十日據外直別院宮婢單登及教坊  
朱頂鶴陳首本坊伶官趙惟一向要結本坊入內承直高長  
命以彈箏琵琶得召入內沐上恩寵乃輒干冒禁典謀侍懿  
德皇后御前忽於咸雍六年九月駕幸木葉山惟一公稱有  
懿德皇后旨召入彈箏於時皇后以御製回心院曲十首付  
惟一入調自辰至酉調成皇后向簾下目之遂隔簾與惟一  
對彈及昏命燭傳命惟一去官服著綠巾金抹額窄袖紫羅  
衫珠帶烏鞞皇后亦著紫金百鳳衫杏黃金縷裙上戴百寶  
花髻下穿紅鳳花鞞召惟一更入內帳對彈琵琶命酒對飲  
或飲或彈至院鼓三下敕內侍出帳登時當直不復聞帳內  
彈飲但聞笑聲登亦心動密從帳外聽之聞后言曰可封有



用郎君惟一低聲言曰奴具雖健小蛇耳自不敵可汗真龍  
后曰小猛蛇卻賽真嬾龍此後但聞惺惺若小兒夢中唬而  
已院鼓四下后喚登揭帳曰惟一醉不起可爲我叫醒登叫  
惟一百通始爲醒狀乃起拜辭后賜金帛一篋謝恩而出其  
後駕還雖時召見不敢入帳后深懷思因作十香詞賜惟一  
惟一持出誇示同官朱頂鶴朱頂鶴遂手奪其詞使婦清子  
問登登懼事發連坐乘暇泣諫后怒痛答遂斥外直但朱頂  
鶴與登共悉此事使含忍不言一朝敗壞安免株坐故敢首  
陳乞爲轉奏以正刑誅臣惟皇帝以至德統天化及無外寡  
妻匹婦莫不刑于今宮帳深密忽有異言其關治化良非渺  
小故不忍隱諱輒據詞并手書十香詞一紙密奏以聞上覽

奏大怒卽召后對詰后痛哭轉辨曰妾託體國家已造婦人之極況誕育儲貳近且生孫兒女滿前豈忍更作淫奔失行之人乎上出十香詞曰此非汝作手書更復何辭后曰此宋國忒里蹇所作妾卽從單登得而書賜之耳且國家無親蠶事妾作那得有親桑語上曰詩正不妨以無爲有如詞中合縫鞞亦非汝所著爲宋國服耶上怒甚因以鐵骨朵擊后后幾至殞卽下其事使參知政事張孝傑與乙辛窮治之乙辛乃繫械惟一長命等訊鞫加以釘灼盪錯等刑皆爲誣服獄成上之上猶未決指後懷古一詩曰此是皇后罵飛燕也如何更作十香詞孝傑進曰此正皇后懷趙惟一耳上曰何以見之孝傑曰宮中只數趙家妝惟有知情一片月是二句中

已含趙惟一三字也上意遂決即日族惟一并斬長命赦后  
自盡

### 王鼎

鼎字虛中涿州人清寧五年擢進士第官觀書殿學士

### 句

誰知天雨露獨不到孤寒

遼史鼎博通經史馬唐俊有文名適上已與同志被禊酌酒  
賦詩鼎偶造席唐俊欲以詩困之先出所作索賦鼎援筆立  
成唐俊驚其敏妙因與定交後坐罪流鎮州居數歲有赦鼎  
獨不免會守臣召鼎爲賀表因以詩貽使者有云云之句上  
憐之召還



鄭若愚

玉石觀音唱和詩

文殊□對普賢臺飾寶□金卽衆哉聖帝特鎔銀作像高人又選玉  
成胎端嚴然自工鑄出光彩俱從星化來因此道圓功德就給孤園  
內一全材

韓資讓

前題

貞珉未用似湮埋選造觀音衆快哉募匠俄鑄大士相成形不自凡  
夫胎琳琅光彩院內滿冰雪威儀天上來珍重吾師能鑿物從今免  
屈非常材

趙庭睦

前題

觀音神力不思議舉世歸依頗異哉人各爭奇金作像工多術巧木  
爲胎積年□石嗟誰顧今日逢師入用來但蘊貞堅潔白德宏材未  
見作遺材

梁援

前題

七尺仙容立殿臺鐫奇鏤異最優哉摸將竺域佛爲像琢就崑峯石  
作胎妙相化身從地出慈尊移步下天來倘非師智巧經度誰識藍  
田舊玉材

趙長敬

前題

昔年避地別燕臺今日因人信美哉貞性果期成妙相睟容元不降  
凡胎燒殘灰劫無凋朽拂盡銖衣任往來一像端嚴傳萬世法門師  
匠肯遺材

馬元俊

前題

天慶寺前一片石造就觀音神在哉八萬由旬妙高首三千世界明  
月胎潛救衆生苦惱去默傳諸佛印心來十首新詩讚功德等閒難  
繼貫休材

劉瓌

前題

久遺貞石混纖埃二像時鐫事卓哉順俗慈悲須假相出塵神力亦



非胎紹名早授昔師記救苦分臨末世來蓋是性堅無變易會逢高  
鑒豈淹材

史仲愛

前題

遺脫貞珉在帝臺高人識辨事奇哉造成補洛山中像不假摩耶腹  
內胎種種形容何處現巍巍神力此中來荒吟詩頌陪諸彥輕重纖  
莖抵巨材

曲正夫

前題

塵埋雨漬近樓臺久棄通衢亦命哉今日方成白玉像昔年誰識紫  
金胎人存□驗功須□物極終知泰自來元是御碑□未建四分材

內一分材

王執中

前題

堅□刻像降蓮臺□敬瞻容睟美哉救難龍魚鬼與火度生卵溼化  
兼胎待多千佛咸聞見善應諸方無去來足表英雄心□力隨□□  
□不遺材

于復先

前題

玉像鐫成置寶臺威嚴神在數奇哉身披雪氎凝山骨眉放虹光剖  
月胎相好盡疑如化出慈悲重爲度生來嚮非大士垂□鑒應被凡  
工作殿材

王仲華

前題

宰雲披霧下峯臺歲久還逢藻鑒哉相爲應根方有像性因絕垢自  
無胎琢磨迴出三身外具足非從一日來萬法皆由人卽顯空門觸  
物願同材

孟初

前題

瑞毫輝映紫金臺鏤石尊容煥赫哉山卷碧雲呈玉骨水搖白日晃  
珠胎一枝楊柳光嚴住百寶蓮花影像來珍重吾師承道蔭義林高  
聳豫樟材

張識



前題

夔峯久剛滯留臺塵拂方能遇鑒哉應手刻成白玉像化身免託子  
宮胎初疑入夢補陀去又訝隨緣震旦來從此睟容日瞻仰億年不  
朽表良材

楊滌瑕

前題

誰認昏蒙明鏡臺吾師智見大雄哉偶窺片石非凡相特命良工刻  
聖胎救苦盡隨威力去欲求還應願心來從前高士有多少不識白  
山一分材

李師範

前題

相兒巍巍儼□裁立承瞻奉亦時哉誰知韞玉貞頑質自是觀音應  
現胎天慶門前遺舊隱補陀山內悟新來幽巖此石知多少不遇□  
人是不材

李□□

前題

和雲巨石拔沈埋鑄作觀音□□哉營自私心分異體出由山腹□  
□胎端凝相□生羣善堅固身存□□來遭遇若非大龍象不過爲  
□□□材

張□□

前題

何代何年築此臺因人得用□□哉□山元作谿雲伴今日翻成□

胎只見威儀隨相現不知示□□□來若非早入名師眼猶被塵  
□□□材

寇□□

前題

誰刻貞珉在寶臺威神相□□哉補陀山下白雲骨極樂天中□  
胎能遣衆生□□去可令千種□□來十篇所贊神通力方見吾  
師□□材

張壻

前題

青松影畔昔爲臺大器今方□□哉拂盡暗塵披素質鑒開諸相□  
胎圓明獨對靈珠現溫潤常含□□來歷劫定隨宏誓在吾師能



□□□材

韓汝礪

前題

□□當時自隗臺豐碑餘剩□□哉得□大□鑄成隊益表中心□  
□胎□肩熟隨金鑿去珠光新入□□來□□結社招唵客盡是皇  
朝□□材

潛研堂金石文跋尾右玉石觀音像詩碑首唱者崇祿大夫  
檢校太師行鴻臚卿英辨大師賜紫沙門智化和之者兵部  
尚書兼門下侍郎平章事鄭若愚左僕射兼中書侍郎平章  
事韓資讓兵部尚書興中尹趙庭睦諸行宮都部署尚書左  
僕射梁援特進禮部尚書參知政事趙長敬觀書殿學士翰

林學士行尙書禮部侍郎知制誥馬元俊中大夫昭文館直  
學士知御史中丞開國侯劉瓌度支使金紫崇祿大夫行尙  
書禮部郎史仲愛乾文閣待制史館修撰曲正夫朝請大夫  
守祕書監開國伯賜紫金魚袋王執中南面統行宮都部署  
□□□尙書吏部員外郎于復先前樞密院吏房承旨行殿  
中少監王仲華朝議大夫知制誥開國子孟初朝散大夫司  
農少卿知大定少尹賜紫金魚袋張識司農少卿知度支副  
使楊滌瑕守殿中少監知析津縣事李師範□□□□行  
御史中丞賜紫金魚袋李□□提點弘法守將作監張□□  
內藏副都監朝散大夫尙書虞部郎中借紫寇□□殿中丞  
直史館張嶠左承制閣門祇候韓汝礪崇祿大夫檢校司徒

辨慧詮正大師賜紫沙門善□凡二十二人書石并篆額者  
門人講華嚴經苾芻性煦也立碑年月則壽昌五年九月也  
遼史韓延徽傳資讓壽隆初拜中書侍郎平章事道宗紀壽  
隆三年四月南府宰相趙延睦出知興中府事九月以梁援  
爲漢人行宮都部署碑載三人結銜皆與史合碑有平章事  
鄭若愚參知政事趙長敬而遼史無之惟本紀壽隆元年見  
參知事趙孝嚴六年見宰相鄭顥官同姓同而名則互異不  
可解也碑後又有講經法姪性連資講僧性鑒二詩字體疏  
密與前不相應又侵末行題款字蓋立石以後補刊者  
案愚與顥敬與嚴字義皆有關合或一名一字二者有一誤

歟



李頌

頌字百藥樹州郡城縣人官至大中大夫守太傅兼門下侍  
中上柱國諡貞憲

拓本趙惟阜撰李頌墓志長工詩若美景良辰花朝月夕必  
須命筆成篇每一章一句出無脛而走人爭傳寫

敘懷

三五年來養病姿素殮君祿合人譏稍同南國休文瘦徒羨西河子  
夏肥只學因緣精進切縱逢花酒極歡稀今春偶失糟糠伴梁上猶  
嫌雙燕飛

拓本墓志娶王氏封上黨縣君容色禮美德為九族冠先公  
七旬六日而亡公吟敘懷詩云云其落句之意旁人聞之尚

猶悽愴况於夫婦之間嗚呼四十年來業詩絕筆於此焉

胡嶠

册府元龜周太祖廣順二年以契丹虞部員外郎胡嶠爲汝州魯山縣令以其歸化故也

五代史蕭翰北歸用邵陽令胡嶠爲掌書記翰死嶠無所依居契丹七年亡歸

句

沾牙舊姓餘甘氏破睡當封不夜侯

清異錄胡嶠飛龍碓飲茶詩云云嶠宿學雄才未達爲耶律德光所掠後間道復歸

句

餅裏數枝婪尾春

堯山堂外紀胡嶠詩云云時人罔喻其意桑維翰曰唐末文人  
有謂芍藥爲婪尾春者婪尾酒乃最後之杯芍藥殿春亦  
得是名

案胡嶠仕遼官非甚小歸中國僅作縣令既又歸遼難竟定  
爲中國人今以附遼人末



遼詩紀事卷五

道流

侯官陳衍緝

劉元英

元英字宗成號海蟾子初名操字昭遠後得道改稱焉遼人一云燕地廣陵人以明經擢第仕燕主劉守光爲相

句

拋離火宅三千指屏去門兵十萬家

薛大訓神仙通鑑素喜性命之說欽崇黃老之教一日忽有道人來謁海蟾乃邀坐堂上待以賓禮問其氏族名字俱不對但自稱正陽子海蟾順風請益道人爲演清淨無爲之宗金液還丹之要既竟乃索雞卵十枚金錢十文以一文置之

几上累十卵於錢若浮圖之狀海蟾驚異之歎曰危哉道人  
曰人居榮祿之場履憂患之地其危有甚於此者復盡以其  
錢擘破爲二擲之而去海蟾因此大悟翌早解印辭朝易服  
從道有詩云云紀當時之實也後遇呂洞賓得金丹之祕旨  
自此往來終南太華閒復結張無夢种放訪陳希夷先生爲  
方外友亦閒作詩有詩集行於世其詠修鍊別有還金篇行  
於世

案海蟾本遼人雖仕守光而守光不成其爲國只得屬之遼

遼詩紀事卷六

釋子

侯官陳衍緝

郎思孝

思孝覺花島海雲寺僧有海山集

和遼主詩二首

爲愧荒疏不敢吟不吟恐忤帝王心本吟出世不吟意以此來批見  
過深

天子天才已善吟那堪二相更同心直饒萬國猶難敵一智寧當三  
智深

天安節題松鶴圖

千載鶴棲萬歲松霜翎一點碧枝中四時有變此無變願與吾皇聖



壽同

案詳卷一興宗下

智化

玉石觀音唱和詩

見說曾爲上馬臺堪嗟當日太輕哉固將積歲舊凡石又向斯辰刻  
聖胎月面渾從毗首出山儀儼似補陀來願同無用恆爲用不譬莊  
言木鴈才

方池波面躡花臺瞻奉無非唱善哉外現熙怡慈作相內含溫潤玉  
爲胎刻雕數向生前就接救專期沒後來故我志誠無倒意三年用  
□兩重才

善□

前題

巍然獨立絕纖埃相好奇哉復□哉因覩工移珉作像方知凡與聖  
殊胎□□未省懷悲喜救苦何曾覺□來□□□□□□□□□□只  
出□□□材

性連

前題

神姿斯就置層臺儼雅威靈衆異哉實智已圓百劫相權儀不許四  
□胎用興體密還復往定闊悲深去又來積歲未承英匠別也當遺  
夢曲□材

性鑒

前題

枕道常爲避暑臺偶然易質大驚哉鑄成月面舒蟾魄斲就珠毫露  
蚌胎龍岳應緣期日往鳳都乘運出塵來若非英鑒能如此十載湮  
沈謂不材

蒙古游牧記石觀音像在朝陽縣南境之天慶寺像高七尺  
圍五尺二寸遼沙門智公所造首唱胎字韻詩二章自鄭若  
愚以下和者二十四人勒石寺中今尙存詩不甚工書頗古  
勁

承德府志天慶寺在朝陽縣遼時建康熙十七年修寺有石  
胎觀音立像遼壽昌五年沙門智化等唱和詩石刻尙存碑  
高五尺跌半沒土中字迹微泐篆額橫鐫玉石觀音像唱和  
詩碑九字詩以次列分四截書共二十二人碑側鐫講經法



姪性□資講僧性覺二人和詩真書分上下層詩不甚工書頗古勁有法

案此刻載壽昌五年卽道宗壽隆五年也壽隆一作壽昌一作盛昌一作昌壽遼史本紀皆不詳近人南海黃任恆著遼年表亦未之及

又案錢大昕廿二史攷異云洪遵泉志載壽昌元寶錢引李季興東北諸蕃樞要云契丹主天祐年號壽昌又引北遼通書云天祚卽位壽昌七年改元乾統予家藏易州興國寺碑安德州靈岩寺碑興中府玉石觀音像唱和詩碑皆壽昌中刻東都事略文獻通攷皆宋人書也亦稱壽昌無有云壽隆者可證壽隆乃壽昌之譌也遼人謹於避諱如光祿改爲崇

祿避太宗諱也女真改爲女直避興宗諱也天祚名延禧乃  
追改重熙年號爲重和於嫌名猶必回避如此道宗乃聖宗  
之孫而以壽隆紀年此理所必無者翁樹培古泉彙考曰遼  
道宗年號壽昌見東都事略范成大攬轡錄

文首座

辨悞頌

兩堂雲水盡紛拏  
王老師能驗正邪  
千古作家趙州老  
草鞋頭戴較些些

萬松老人從容庵錄  
南泉斬貓公案遼朝  
啟上人作鏡心錄  
訶南泉殺生造業  
文首座作無盡燈  
辨悞云古本以手  
作虛斫勢豈真一刀  
兩斷鮮血淋漓哉  
頌云云

遼詩紀事卷七

屬國

侯官陳衍緝

張元

元華州人入西夏

容齋三筆西夏曩霄之叛其謀皆出于華州士人張元與吳昊而其事本末國史不書比得田晝承君集實紀其事云張元吳昊姚嗣宗皆關中人負氣倜儻有縱橫才相與友善嘗薄遊塞上觀覘山川風俗有經略西鄙意姚題詩崆峒山寺壁范文正公巡邊見之大驚又有踏破賀蘭石掃清西海塵之句張爲鸚鵡詩卒章有好著金籠收拾取莫教飛去別人家吳亦有詩將謁韓范二帥恥自屈不肯往乃龔大石刻詩



其上使壯夫拽之于通衢三人從後哭之欲以鼓動二帥既而果召與相見躊躇未用閒張吳徑走西夏范公以急騎追之不及乃表姚入幕府張吳及至夏國夏人以爲謀主以抗朝廷連兵十餘年西方至爲疲弊職此二人爲之時二人家屬羈縻隨州閒使諜者矯中國詔釋之人未有知者後乃聞西人臨境作樂迎此二家而去自是邊帥始待士矣張有雪詩吳詩獨不傳觀此數聯可想見其人非池中物也承君所記如此予謂張吳在夏國然後舉事不應韓范作帥日尙猶在關中豈非記其歲時先後不審乎張吳之名正與羌酋二字同蓋非偶然也

程史景祐末有二狂生曰張曰吳皆華州人薄游塞上覘覽

山川風俗慨然有志於經略恥於自售放意詩酒語皆絕豪  
嶮驚人而邊帥豢安皆莫之知俚無所適聞夏酋有意窺中  
國遂叛而往二人自念不力出奇無以動其聽乃自更其名  
卽其都門之酒家劇飲終日引筆書壁曰張元吳昊來飲此  
樓邏者見之知非其國人也迹其所憩執之夏酋詰以入國  
問諱之義二人大言曰姓尙不理會乃理會名耶時曩霄未  
更名且用中國賜姓也於是竦然異之日尊寵用事寶元西  
事蓋始此其事國史不書詩文雜見於田承君集沈存中筆  
談洪文敏容齋三筆其爲人槩可想見

詠雪

五丁仗劍決雲霓直取銀河下帝畿戰退玉龍三百十一作萬敗鱗殘

甲一作風捲滿空一作天飛

句

有心待擲月中兔更向白雲頭上飛西清詩話

西清詩話華州狂子張元天聖閒坐累終身每託興吟詠如雪詩云云白鷹云云其他怪譎類是後竄夏國教元昊為邊

患

將入夏州吟

太公年登八十餘文王一見便同車如今若向江邊釣也被官中配看魚

東齋錄景祐中作絕句云云此詩畢入夏州

題好水川界上寺



夏竦何曾聳韓琦未是奇滿川龍虎舉猶自說兵機

清波雜志韓魏公領四路招討駐延安忽夜有攜匕首至臥  
內者乃夏人所遣也公語之汝取我首去其人曰不忍得諫  
議金帶足矣明日公不治此事俄有守陴者以元帶來納留  
之或曰初不治此事爲得體卒受其帶則墮姦人計中矣公  
嘆非所及延安刺客乃張元所遣元本華陰布衣使氣自負  
嘗再以詩干魏公公不納遂投西夏而用事迨王師失律于  
好水川元題詩于界上寺云云其不遜如此案熊子復著九  
朝通略於康定元年書華州進士張源逃入元昊界詔賜其  
家錢米以反間之却用此源字

通言  
總目  
卷一

三  
十一

遼詩紀事卷八

屬國

侯官陳衍緝

高麗王徽

徽字燭幽顯宗詢第三子慶曆七年卽位在位三十七年諡仁孝王廟號文宗

然燈夜述懷

宿罪應深近契丹歷年徒貢事多般忽蒙舜日龍綸召便侍堯天佛會觀燈焰似蓮裝闕陷月華如水洩雲寒夷身幸入華晉境甚惜今宵漏滴殘

文昌雜錄熙寧二年始命招接高麗入貢王徽喜甚次年二月十五日然燈如中華上元徽賦述懷詩云云



夢至中華京師覺而賦此

惡業因緣近契丹一年朝貢幾多般移身忽到京華地可惜中霄漏  
滴殘

石林詩話元豐初高麗遣使來朝云契丹誅求不堪國主王  
徽常誦華嚴經祈生中國一夕夢至京師覺而慕之乃爲詩  
以記云云

案石林燕語與文昌雜錄所紀事緣迥然各別豈傳聞異詞  
耶並采之以備考

案徽父詢有書侍郎姜邯贊告身後詩云庚戌年中有虜塵  
干戈深入漢江濱當時不用姜公策舉國皆爲左衽人見東  
國史略可證徽不願附遼之意

朴寅亮

寅亮官左僕射參知政事諡文烈

使宋過龜山寺作

巖巖峻石疊成山下著珠蟻一水環塔影倒垂淮浪底鐘聲遙落碧  
雲間門前客棹洪濤急竹下僧棋白日閒一奉勝遊堪惜景故留詩

句約重還

輿地  
紀勝

案歷代吟譜但錄中二聯作塔影倒淮沈浪底磬聲浮月落  
雲間云云

澗水燕談高麗最好儒學祖宗以來數有賓客貢士登第者  
使臣民官侍郎金第與朴寅亮詩尤精如潤州龜山寺詩云  
云等句中土人亦稱之

朴景綽

景綽字令裕寅亮子官至尙書左僕射參知政事諡章簡

句

勝事年年傳習久盛觀今屬遠方賓

續夢溪筆談元祐六年高麗使人入貢上元節於闕前賜酒

魏繼延朴景綽皆賦觀燈詩時有佳句景綽句云云

案拓本章簡公墓志作諱景仁姓朴氏字令裕然綽與裕有

關合

韓繳如

繳如官高麗副使

泣涕汎瀾欲別離此生無復再來期謾將寶玉陳深意莫忘思人見



物時

石林詩話高麗使者余撫之既厚每相感餞行至占雲館而別其副韓繳如馬上忽使人持一大玉帶贈余云此唐故物其家世以爲寶今以爲獻且於笏上自帶一詩相別云云余力辭之其詞雖拙樸然亦可見其意也

魏繼延

繼延爲使宋進奉副使

句

千仞綵山擎日起一聲天樂漏雲來

續夢溪筆談繼延觀燈句云云

李資諒

資諒仁州人官中書侍郎平章事

睿謀殿賜宴恭和御製

鹿鳴嘉會宴賢良仙樂洋洋出洞房天上賜花頭上豔盤中宣橘袖  
中香黃河再報千年瑞綠醕輕浮萬壽觴今日陪臣參盛際願歌天  
保永無忘

高麗史資諒嘗奉使如宋徽宗御睿謀殿召一行人賜宴作  
詩示之資諒卽製進云云大加稱賞

張晉公

寒松亭

月白寒松夜波平鏡浦秋哀鳴來又去有信一沙鷗

居易錄鄭麟趾高麗史載俗樂乃宋遼時其國人所作也有

曰寒松亭者相傳此歌書於瑟底流至江南國人張晉公奉使江南江南人問之張作詩解之云云

### 金緣

緣官兵部員外郎

### 聯句

馬蹄踏雪乾雷動旗尾翻風烈火飛

東國史略高麗肅宗明孝王七年（天祚乾統二年）遼遣中書舍人孟初來賀生辰兵部員外郎金緣爲館伴初見其年少頗易之一日並轡出郊雷始霽初唱云云緣卽對云云初愕然曰眞天才也由是情好日篤相唱和及別解金帶贈之



金黃元

黃元睿宗朝官簽書樞密院使

句

鳳銜綸綽從天降鰲駕蓬萊渡海來

東國史略黃元自幼好學登科文詞推爲海東第一與李載同在翰林齊名時契丹使至黃元作內宴口號有云云之句使驚歎

康日用

句

頭白老翁看殿後眼明儒者倚欄邊

東國史略睿宗十七年御紗樓召文臣等刻燭賦牡丹詩安

寶麟爲第一時康日用以能詩名王佇觀其作纔得一聯袖  
稿伏御溝中王取見之曰所謂白頭花鈿滿面不如西施半  
妝

李齊賢

齊賢字仲思歷官門下侍中封雞林府院君卒謚文忠著有  
亂稿十卷

鄭瓜亭

憶君無日不霑衣政似春山蜀子規爲是爲非人莫問只應殘月曉  
星知

高麗史鄭瓜亭內侍郎中鄭敍所作也敍自號瓜亭聯昏外  
戚有寵於仁宗及毅宗卽位放歸其鄉東萊曰今日之行迫

於朝議也不久當召還敍在東萊日久召命不至乃撫琴而歌之詞極悽惋齊賢作詩解之云云

居士戀

鵲兒籬際噪花枝  
螿子牀頭引網絲  
余美歸來應不遠  
精神早已報人知

高麗史行役者之妻作是歌託鵲螿以冀其歸也齊賢作詩解之云云

處容

新羅昔日處容翁  
見說來從碧海中  
貝齒頰脣歌夜月  
鳶肩紫袖舞春風

高麗史新羅憲康王游鶴城還至開雲浦忽有一人奇形詭



服詣王前歌舞讚德從王入京自號處容每月夜歌舞於市  
竟不知其所在時以爲神人後人異之作是歌齊賢作詩解  
之云云

五冠山

木頭雕作小唐雞筋子拈來壁上棲此鳥膠膠執時節慈顏始似日  
平西

居易錄本孝子李文忠作

高麗國師

四庫全書總目星命總括三卷舊本題耶律純撰有純原序  
末署統和二年自稱爲翰林學士奉使高麗議地界因得彼  
國國師傳受星躔之學云云

步天作

得富非難得壽難壽星須把令星看令星若是逢生旺壽算巍巍等  
泰山

且說夫星是尅星高強必是聘賢人若居父母并兄弟端的因親上  
致親

遼詩話純自序云源髓老人得之於元齋元齋得之於海上  
異人有高麗國師賦其步天警句有云云亦詩之流也

無名氏

廣化門春帖

雪痕尙在三雲陞日脚初升五鳳樓百辟稱觴千萬壽袞龍衣上瑞  
光浮

高麗圖經廣化門王府之偏門也榜周易繇辭五字仍有春  
帖子云云

無名氏

咸寧節大會華夷二部樂口號

當時瑞色照宮林和氣濃濃破積陰香火千家祈國壽笙歌二部樂  
賓心興酣日影移珠箔舞罷花枝倒玉簪須盡清歡酌美景從容莫  
訴酒杯深

高麗圖經王侯以八月十七日生謂之咸寧節其日大會公  
族貴臣近侍於長慶殿中國賈人之在館者亦遣官爲館伴  
用華夷二部樂亦有致語其口號云云

無名氏



龍蛇二歌

三藏寺裏點燈去有社主兮執吾手倘此言兮出寺外謂上座兮是  
汝語

有蛇舍龍尾聞過太山岑岑人各一語斟酌在兩心

王士禎居易錄引高麗史曰高麗俗樂有名龍蛇二歌忠烈  
王狎羣小選官妓女巫有姿色者籍置宮中時人歌之云云

遼詩紀事卷九

無名氏

侯官陳衍緝

墨鴉

要識塗鴉意栖遲未得歸星稀月明夜皆欲向南飛

詩話總龜幽薊數州自石晉賂戎後懷中華不已有使北者  
見燕中傳舍壁畫墨鴉甚工旁題詩云云

案李調元全五代詩云原本只有下二句上二句應是後人  
附會姑並存以俟考

題關西驛舍

孤星熒熒照寒野漢馬蕭蕭五陵下廟堂不肯用奇謀天子徒勞聘  
賢者萬里危機入燕薊八方殺氣衝靈夏逢時還似不逢時已矣吾

生真苟且

程史景祐以後羌人叛或有無名氏題關西驛舍云云

寄夫詩

垂楊傳語山丹你到江南艱難你那裏討箇南婆我這里嫁箇契丹  
軒渠錄紹興辛巳米忠信夜於淮南劫寨得一箱篋乃是燕  
山來者附書十餘封多是軍士妻寄夫者內一紙別無他語  
止詩一首云云



遼詩紀事卷十

樂章

侯官陳衍緝

鼓吹曲

五年一巡狩仙仗到人間問稼穡艱難蒼生洗眼秋光裏今日見天顏  
金戈玉斧臨香火馳道六龍閑歌謠到處皆相似天子壽南山

金史樂志熙宗天眷三年九月幸燕京所用鼓吹導引曲尙仍遼舊案其辭（無射宮）云云



遼詩紀事卷十一

雜歌謠諺語

侯官陳衍緝

述律后童謠

青牛媪會避路

遼史太祖述律后有雄略嘗至遼土二河之會有女子乘青牛車倉卒避路忽不見未幾童謠云蓋諺謂地祇爲青牛媪云太祖卽位羣臣上尊號曰地皇后

囚耶律都沁誓語

鐵鎖朽當釋汝

遼文存淳欽皇后囚都沁誓云云

焚骨咒辭



夏時向陽食冬時向陰食使我射獵猪鹿多得

五代史四夷傳契丹居喪以不哭為勇載其尸深山置大木  
上後三歲往取其骨焚之酌而咒云云此言其最初國俗也  
案契丹國志載此小異又無韻

幽州謠

舊來誇載竿今日不堪看但見五月裏清水河邊見契丹

唐書安祿山未叛時幽州有謠云云時祿山與契丹連兵往  
往收其人於帳下故云

墓志中韻語

東接徐州景西連羣峯山北面伽里鎮南有玉石岩上面連霄漢下  
澈定生關八方齊統領四海盡□班

拓本張哥墓志此墓云云青陽郡奚耶律太保張耳男毫次男望哥孫子某某重熙四年

懿德皇后宮中語

孤穩壓帕女古鞞菩薩喚作耨幹麼

焚椒錄后及長姿容端麗爲蕭氏稱首皆以觀音目之以清寧元年冊爲皇后宮中爲語云云蓋以玉飾首以金飾足以觀音作皇后也

楊佶歌

何以蘇我上天降雨誰其撫我楊公爲主

遼史重熙十五年楊佶爲武定軍節度使時境內亢旱苗稼將槁視事之夕雨澤沾足百姓歌云云

歎蕭巖壽語

以狼牧羊安得久長

遼史北面林牙蕭巖壽奏耶律乙辛有陰謀搖動太子上悟  
出乙辛乙辛尋復入流巖壽於烏隗路終身拘作巖壽雖竄  
逐恆以社稷爲憂時人爲之語云云卒爲乙辛所害

臻蓬蓬歌

臻蓬蓬外頭花花裏頭空但看明年正二月滿城不見主人翁

江萬里宣政雜錄曰宣和初收復燕山以歸朝遼民來居京  
師其俗有臻蓬蓬歌每扣鼓和臻蓬蓬之音爲節而舞人無  
不喜聞其聲而效之者其歌云云本遼讖故京師不禁然次  
年徽宗南幸次年二聖北狩



伎者歌

百尺竿頭望九州前人田土後人收後人收得休歡喜更有收人在  
後頭

宣政雜錄又有伎者以數丈長竿繫椅於杪伎者坐椅上少頃下投於小棘阬中無偏頗之失未投時念詩云云此亦遼人所作而竟成宋讖焉

北人諺

寧違勅旨無違魏王白帖子

文獻通考洪基能守成然嬖幸其臣耶律英弼（卽乙辛）累封魏王北人諺云云

時諺

偏憐之子不保業難得之婦不主家

遼史宗室傳

天祚時諺

五箇翁翁四百歲南面北面頓瞋睡自己精神管不得有甚心情殺女直

契丹國志天祚親征敗績中外歸罪蕭奉先於是謫奉先西南面招討擢用耶律大悲奴爲北樞密使蕭查刺同知樞密院使間有軍國大事天祚與南面宰相執政吳庸馬人望柴誼等參議數人皆昏謬不能裁決當時國人諺云云

契丹小兒俗語

月明裏和尙門子打水底裏樹上老鴉坐

洪邁夷堅丙志十八曰契丹小兒初讀書先以俗語顛倒其文句而習之至有一字用兩三字者如烏宿池中樹僧敲月下門兩句其讀時則云云大率如此案日本文法亦如此

### 小人歌

皇天生小人皇地載小人日月照小人北斗輔小人

錢氏私誌燕北風俗不問士庶皆自稱小人宣和間有遼國右金吾衛上將軍韓正歸朝授檢校少保節度使對中人以上說話卽稱小人中人以下卽稱我家每日到漏舍誦天童經數十徧其聲朗朗然且云對天童說話豈可稱我自皇天生我皆改爲小人云云

### 賣地券語



賣與中丞阿里吉

青鞵踏雪志碧雲寺有石幢本當時賣地券也演作韻語末云云吉作平聲蓋從國語古人游戲翰墨書券每作韻語如王褒僮約石崇奴券皆然戴良失父零丁亦用韻語

遼詩紀事卷十二

鬼神

侯官陳衍緝

甘露寺鬼

西軒詩

趙壹能爲賦鄒陽解獻書可惜西江水不救轍中魚

全五代詩吳王收復浙右之明年甘露寺僧夏夜見數鬼自  
西軒出一衣南朝衣一衣北虜衣一衣縫掖衣一衣朱衣相  
顧而言曰朝代雖殊古今一致請各徵曩時臨危一言以代  
絲竹可乎於是各賦四句虜衣者詩云云

遼故宮美人

倚欄歌

JUN 5 - 2001

EAST ASIAN STUDIES

明月滿空階梧桐落如雨涼颼襲人衣不知秋幾許

遼邸紀聞遼王後宮中往往有抑鬱致死者今沙橋門外宮人斜卽羣姬埋香處每陰寒晦黑過者聞紅愁綠慘之聲近有少年子乘醉蹋月迷入空宮經素香亭下覩一美人霓裳練裙倚闌而歌云云歌竟杳然不見



(83022)

事紀詩遼

究必印翻有所權版

中華民國二十五年五月初版

每册定價國幣陸角  
外埠酌加運費匯費

纂輯者 陳 衍

發行人 王 雲 五  
上海河南路

印刷所 商務印書館  
上海河南路

發行所 商務印書館  
上海及各埠

(本書校對者鮑嘉祥)

四〇七三上

(22028)  
5 卷 精 裝

中華民國二十五年五月

發行所

發行所

發行所

發行所

發行所

發行所

中華民國二十五年五月

發行所

發行所

BOOKS

書前

原價  
特價





250  
100